



Broj: 01/2a- 05-1-915/17
Sarajevo, 12.5.2017.



PRIMLJENO:	30-05-2017
Organizaciona jedinica	Klasifikaciona oznaka

ZABILJEŠKA

sa sastanka članova Komisije za vanjske poslove Predstavničkog doma PSBiH s delegacijom Komisije za vanjske poslove Predstavničkog doma Parlamenta Italije

Sastanak s delegacijom Komisije za vanjske poslove Predstavničkog doma Parlamenta Italije održan je 8.5.2017. U delegaciji Komisije za vanjske poslove Predstavničkog doma Parlamenta Italije bili su: predsjednik Komisije Fabrizio Cicchitto, članica Komisije Marietta Tidel, član Komisije Daniele del Grosso i savjetnica Francesca Piazza. U delegaciji su bili i N.J.E. Nicola Minasi, ambasador Italije u Bosni i Hercegovini, Alberto Comito, prvi sekretar Ambasade, i Validan Puljić, prevodilac.

U ime Komisije za vanjske poslove Predstavničkog doma PSBiH sastanku su prisustvovali Nermina Kapetanović, druga zamjenica predsjedavajuće Komisije, te Mirsad Đonlagić i Senad Šepić, članovi Komisije.

Druga zamjenica predsjedavajuće Komisije za vanjske poslove **Nermina Kapetanović** pozdravila je Fabrizia Cicchitta i sve članove delegacije te im u svoje i u ime Senada Šepića i Mirsada Đonlagića poželjela dobrodošlicu. Ona je izrazila zadovoljstvo posjetom delegacije iz Italije i kazala da Italiju osjećamo kao prijateljsku zemlju.

Fabrizio Cicchitto predstavio je članove delegacije i kazao da je ova posjeta dokaz da Italija s velikim interesovanjem gleda na područje Zapadnog Balkana. Izrazivši uvjerenje da Evropa nije samo sjeverna i južna Evropa nego da ona mora biti i na cijelom Balkanu, on je kazao da su spremni da kao prijateljska država pomognu u svemu na putu prema euroatlantskim integracijama. Gospodin Cicchitto je kazao da oni sa zebnjom gledaju na dešavanja na Balkanu zbog situacije na Bliskom istoku i dodao da, uzimajući u obzir i migrantsku krizu, moraju razmišljati o tome da se na Balkanu ne bi dogodilo nešto slično kao na Bliskom istoku. Izrazio je uvjerenje da je Evropi potrebno, pogotovo nakon krize izazvane Brexitom, da pruži ruku koja bi povukla cijeli region Balkana prema evropskim integracijama i ponudio da Italija bude naš glas kad je u pitanju Evropska unija, s ciljem stvaranja ravnoteže na cijelom Balkanu koja bi se uspostavila ulaskom u EU. Kazao je da oni razumiju probleme koje imamo i dodao da su oni došli u posjetu sa željom i voljom da razgovaraju o svim tim stvarima i da na neki način pomognu.

Nermina Kapetanović se zahvalila, pogotovo što su to riječi predstavnika države koja je jedan od osnivača Evropske unije. Dodala je da sama činjenica da je Italija jedanaesta po obimu investicija, te da prisustvo više od 50 italijanskih firmi koje rade u Bosni i Hercegovini i međusobna trgovinska razmjena predstavlja ohrabrenje onima koji smatraju da trgovina i jačanje ekonomskih odnosa mogu doprinijeti boljitku i rješavanju svih postojećih problema. Zamolila je sagovornike da pozovu italijanske investitore da još više investiraju u Bosnu i Hercegovinu iz prostog razloga što su vlade Republike Srpske i Federacije BiH te Vijeće ministara BiH opredijeljeni da stvaraju olakšice za registraciju novih firmi i za ulazak svježeg kapitala na područje Bosne i Hercegovine. Navela je da mogućnosti za saradnju postoje u prehrambenoj, drveno-prerađivačkoj i industriji kože. Zahvalila se na činjenici da su poslanici iz Italije u Parlamentarnoj skupštini Vijeća Evrope 2013. godine bili među naj snažnijim lobistima za Bosnu i Hercegovinu u situaciji u kojoj je BiH trebala biti isključena iz Vijeća

Evrope zbog neprovođenja presude Suda za ljudska prava u Strazburu u predmetu Sejdić i Finci protiv BiH. Također se kao ljekar, humanista, anesteziolog zahvalila građanima područja Čezvi i Univerzitetu koji je mnogo pomogao u edukaciji mladih ljekara iz BiH kao i na svim spašenim životima, posebno u slučajevima transplantacije u kojima je Italija puno pomogla.

U vezi s jačanjem ekonomskih odnosa i vanjskotrgovinskom razmjenom između Bosne i Hercegovine i Italije napomenuto je da bi prilika za produbljivanje odnosa mogao biti Biznis forum koji će biti održan u okviru predstojećeg samita Berlinskog procesa u Trstu 12. jula ove godine.

Senad Šepić je, također, pozdravio delegaciju iz Italije i izrazio zadovoljstvo sastankom. Kazao je da je Evropska unija važna zbog stabilnosti i da je zbog toga važno imati iskrene prijatelje kao što je Italija koji će to govoriti u evropskim institucijama. Također je važno da prijatelji kao što je Italija ovaj dio svijeta posmatraju kao region i da u tom smislu imaju širi regionalni pogled i pristup, te je predstojeći samit u Trstu prava prilika za razgovor o ovoj temi i za komunikaciju, dodao je g. Šepić.

Mirsad Đonlagić je pozdravio delegaciju i kazao da mu je velika čast i zadovoljstvo razgovarati s italijanskim prijateljima. On je skrenuo pažnju na neke aspekte odnosa Evropske unije prema Bosni i Hercegovini i ovom regionu. On smatra da je Evropa zadovoljna rezultatima izbora u Holandiji i Francuskoj jer su se stvari poslije Brexita relativno bile usložnile, ali poslije ovih izbora one su se stabilizirale. U tom kontekstu je bitno da se Evropska unija sada, osim svojim problemima, može baviti i nekim drugim stvarima kao što su pitanja u vezi s ovim regionom na kojem se sukobljavaju različiti interesi, dodao je g. Đonlagić. Naglasio je da je situacija na Balkanu vrlo zapaljiva i da nije dobro da Evropska unija ne vidi taj problem kao vrlo ozbiljan i da ne nastoji da se ubrzavaju procesi pristupanja Evropskoj uniji bez obzira što i politike u Bosni i Hercegovini ne čine dovoljno da bi se ti procesi ubrzali. Ako se ostavi previše vremena procesu pridruživanja Evropskoj uniji stvorit će se prostor za neke retrogradne procese koji mogu ugroziti evropsku perspektivu Balkana i zato je značajna uloga svih koji mogu pomoći, a u tom smislu Italija kao prijateljska zemlja koja razumije probleme ovog područja može mnogo pomoći.

Nermina Kapetanović je na kraju sastanka, u svojstvu predsjedavajuće Grupe prijateljstva za zapadnu Evropu PSBiH, pozvala parlamentarce iz Italije da pomognu pri ostvarivanju saradnje s Grupom prijateljstva italijanskog parlamenta za saradnju s Bosnom i Hercegovinom.

SEKRETARKA KOMISIJE

Merdžana Iglica

